


Durante un anochi exitoso den Scol di Arte, San Nicolas:

Melendy Bisslik- Neuman a gana competencia Poeta di Patria 2019

ORANJESTAD (AAN) -- E aña aki Ministerio di Cultura, Departamento di Cultura Aruba (DCA), Comision Celebracion Dianan Nacional, Comision Arte di Palabra y Grupo Corector di Papiamento a organiza e evento "Poeta di Patria 2019", cu a tuma lugar na Scol di Arte, San Nicolaas. Esaki tabata un anochi exitoso y tabatin un total di 20 poema cu a keda declama. Binti poeta, cu a duna un tremendo presentacion. Diahuebs anochi dilanti di un publico di mas cu cien persona. Tema di Poeta di Patria ta "Aruba y su cultura". E anochi a inicia cu tononan di musica di steelpan presenta pa e hoben Marver

Guedez. Despues a cuminsa e programa cu nos himno nacional Aruba dushi Tera, canta pa otro hoben Cy-Anne Simmons. Drs. Siegfried Dumfries, director di DCA a hiba palabra y a bisa cu DCA ta mira e importancia di e evento aki den cuadro di 18 di maart y alabes nos dia nacional. El a muestra cu ta importante pa celebra y duna un plataforma na literatura na Papiamento. Tambe ta duna nos poetanan oportunidad pa expresa amor na nos patria y balor pa nos pais. Cu esaki ta stimula bon uso di nos idioma Papiamento. E aña aki tabatin 23 persona cu a inscribi, akinan por mira cu tin aprecio y necesidad pa

un evento asina. Na final a felicita tur e participantenan di e anochi aki. Sr. Atan Lee como iniciado di e idea di e evento aki, a bisa con importante e ta haya e anochi aki. Cu Poeta di Patria ta e di dos evento mas importante despues di e ceremonia protocolar oficial di nos Himno y Bandera. P'esey a ganador(a) di e Poeta di Patria mester haya su honor tocando nos himno



nacional ora e ser anuncia na final di e competencia. El a felicita e participantenan y bisa cu ta nan ta haci e evento aki uno grandi.

E anochi tabata hopi bunita y cu varios poemanan fuerte. Cuerpo di Hurado tabatin un anochi duro. Un anochi anima cu canto di Cy-Anne Simmons, ganado di e proyecto di Departamento di Cultura y Cas di Cultura, esta Gang di Arte/Manic Monday, 'Papiamento'. Canto y baile di Kevin Marquez, miho conocí como Nahliel. Nahliel, kende a gana e premio Papiamento durante e competencia di Gang di Arte/Manic Monday cu e canción titula 'Papia cu mi Papiamento' y acompaña pa The Empire Dance Group.



Poeta di Patria 2019 a keda den persona di Melendy Bisslik-Neuman, na di dos luga ta Jhon Freddy Tobon Montoya y di tres luga ta Ruthy Vrieswijk. Departamento di Cultura Aruba y Comision organizado ta wak atras riba un evento exitoso na unda literatura den idioma Papiamento a biba. Cultura nos tin cu bib'e. Cultura ta nos! Nos cultura, nos tin cu stim'e, bib'e, aprecie'e!